

六韜直解 六

犬韜

			五三〇	漢書門
六四	一	一	一	
冊	架	函	號	類

庫文閣內			
五九	五三〇	漢	
函	一	書	
一六	一		
架	冊	號	類

內閣文庫		
番號	漢	5301
冊數	6	( 6 )
函號	299	197



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



六韜直解卷之六

犬韜


分合第五十一

分合者吾三軍散為數處今欲聚為一陳并力而合戰也

武王問太公曰王者帥師三軍分為數處將欲期會合戰約誓賞罰為之奈何

武王問太公曰王者帥師而出三軍分為數處為將者欲期會與人合戰約誓賞罰

淺草文庫



將爲之奈何

太公曰凡用兵之法三軍之衆必有分合之變其大將先定戰地戰日然後移檄書與諸將吏期攻城圍邑各會其所明告戰日漏刻有時大將設管而陳立表轅門清道而待諸將吏至者校其先後先期至者賞後期至者斬如此則遠近奔集三軍俱至并力合戰太公對曰大凡用兵之法三軍之衆必有分合之變其大將先定會戰之地與會戰

之日然後行移檄書與諸將吏期約攻入之城圍人之邑各會聚於相約之處明告將吏以會戰之日漏刻亦有時然後大將設營布陣立表柱於轅門清道而待之轅門解見尉繚子書諸將吏至者校量其先後先期至者賞之後期至者斬之如此則遠近皆來會集三軍俱應期而至與吾併力而合戰矣

或鋒第五十二

或鋒者選吾武勇鋒銳之士伺其便則出而破敵也

武王問太公曰凡用兵之要必有武車驍騎馳陣選鋒見可則擊之如何而可擊

武王問太公曰凡用兵之要法必有武車驍騎馳陣選鋒精銳之士見敵有可乘之隙則擊之敵勢如何而可擊也

太公曰夫欲擊者當審察敵人十四變變見則擊之敵人必敗

太公對曰夫欲擊敵者當審察敵人十四變變動之形既見則出吾武銳之士擊之敵人必敗矣

武王曰十四變可得聞乎

武王曰敵人十四變亦可得而聞乎

太公曰敵人所集可擊人馬未食可擊天時不順可擊地形未得可擊奔走可擊不戒可擊疲勞可擊將離士卒可擊涉長路可擊濟水可擊不暇可擊阻難狹路可擊亂行可擊

心怖可擊

太公對曰敵人所會集之處乘其行列未定則可擊之人馬飢餓未曾飲食則可擊之天時不順如隆冬士卒寒凍盛夏士卒疾疫逆大風甚雨之利遇旱蝗霜雹之災皆可擊之地形未得如困於險阻陷於泥濘車騎不得平地步卒不依山阪皆可擊之士卒奔走則氣不屬故可擊之三軍不戒心必怠惰故可擊之士卒疲勞則力不

全故可擊之將離士卒則令不一故可擊之涉長路前後不接故可擊之濟水必有半渡半出者故可擊之士卒不閒暇必亂而不整故可擊之阻難狹路力必不齊故可擊之亂行將無節制也故可擊之心怖軍奪氣也故可擊之吳子論敵必可擊之道與此大同小異恐出於是

練士第五十三

練士者簡練材勇之士各以類聚

之也

武王問太公曰練士之道奈何太公曰軍中  
有大勇力敢死樂傷者聚爲一卒名曰冒刃  
之士

武王問太公曰簡練士衆之道奈何太公  
對曰凡軍中有大勇力果敢於死喜樂其  
傷者聚而爲一卒百人爲卒名之曰冒刃  
之士冒刃者冒敵之刃而不畏也

有銳氣壯勇強暴者聚爲一卒名曰陷陳之  
士  
有精銳之氣壯而且勇強而且暴者聚爲  
一卒名之曰陷陳之士陷陳者陷敵之陳  
而不懼也

有奇表長劍接武齊列者聚爲一卒名曰勇  
銳之士

有奇表出衆好用長劍接武而齊列者聚  
爲一卒名之曰勇銳之士勇銳不怯懦也  
有披距伸鈎強梁多力潰破金鼓絕滅旌旗

者聚爲一卒名曰勇力之士

披距即超距謂跳躍也昔甘延壽投石投距絕於等倫王剪士卒投石超距即此義也或曰披字乃投字之誤也伸鉤能伸鑿鉤也以其強梁而多力故能潰破敵之金鼓絕滅敵之旌旗聚爲一卒名曰勇力之士

有踰高絕遠輕卒善走者聚爲一卒名曰寇兵之士

有能踰高城絕遠道輕足善走者聚爲一卒名曰寇兵之士寇暴疾也

有王臣失勢欲復見功者聚爲一卒名曰死鬪之士

有先爲王臣因事失勢欲復見功於上者聚而爲一卒名曰死鬪之士死鬪者恨其失勢欲死鬪立功也

有死將之人子弟欲爲其將報仇者聚爲一卒名曰死憤之士

有將帥死於戰鬪之間其子弟欲與其將報仇者聚而爲一卒名曰死憤之士死憤者恨其父死而懷憤怒者也

有貧窮忿怒欲快其志者聚爲一卒名曰必死之士

有受貧窮心懷忿怒欲快其志者聚而爲一卒名曰必死之士必死者期於必死而不欲生也

有贅婿人虜欲掩迹揚名者聚爲一卒名曰

勵鈍之士

有出贅爲婿或被人所虜欲掩其贅婿之迹揚美好之名者聚而爲一卒名曰勵鈍之士勵鈍者激勵鈍兵也

有胥靡免罪之人欲逃其恥者聚爲一卒名曰幸用之士

胥靡者聯繫相隨服役也免刑罰之罪爲胥靡欲逃其恥辱者聚爲一卒名曰幸用之士幸其得用而免其恥辱也



有材技兼人能負重致遠者聚爲一卒名曰待命之士

有材能技藝兼人又能負任重物而致遠道者聚而爲一卒名曰待命之士

此軍之練士不可不察也

此十一者乃軍之練士不可不審察也吳子論軍之練銳只以五者言之恐出於此

### 教戰第五十四

教戰者教之坐作進退分合解結

之法也

武王問太公曰合三軍之衆欲令士卒服習教戰之道奈何

武王問太公曰會合三軍之衆欲令士卒皆服習教戰之道將如之何

太公曰凡領三軍必有金鼓之節所以整齊士衆也將必先明告吏士申之以三令以教操兵起居旌旗指麾之變法

太公對曰凡統領三軍必有金鼓之節金

以止之鼓以進之所以整齊士衆也將帥必先明告吏士申之以三令三令者三次號令之又令有先後謂令甲令乙令丙亦三令也以教訓操兵起居旌旗指麾之變法操兵起居即坐作進退分合解結也旌旗指麾即抵旗則超颺旗則戰麾左而左麾右而右也

故教吏士使一人學戰教成合之十人十人學戰教成合之百人百人學戰教成合之千

人千人學戰教成合之萬人萬人學戰教成合之三軍之衆大戰之法教成合之百萬之衆故能成其大兵立威於天下武王曰善哉故教吏士之法使一人先學戰教成合之十人使十人學戰教既成合之百人使百人人學戰教既成合之千人使千人學戰教既成合之萬人使萬人學戰教既成合之三軍之衆三軍之衆三萬七千五百人也大戰之法三軍教成合之百萬之衆而摠

閱之故能成其大兵立威於天下武王曰  
公言善哉與吳起李靖教戰之法大同小  
異亦恐出於此

均兵第五十五

均兵者車騎步三者視地之險易  
相參而使其勢力均也

武王問太公曰以車與步卒戰一車當幾步  
卒幾步卒當一車以騎與步卒戰一騎當幾  
步卒幾步卒當一騎以車與騎戰一車當幾

騎幾騎當一車

武王問太公曰以車與敵之步卒戰一乘  
車可當幾步卒幾步卒可以當一車以騎  
兵與步卒戰一騎兵可當幾步卒幾步卒  
可以當一騎以車與騎戰一乘車可當幾  
騎幾騎兵可以當一車

太公曰車者軍之羽翼也所以陷堅陳要強  
敵遮走北也騎者軍之伺候也所以踵敗軍  
絕糧道擊便寇也

太公對曰車者三軍之羽翼也羽翼者如鳥有羽翼憑之而奮飛也故車所以能陷人之堅陳要寇之強敵遮彼之走北也騎者三軍之伺候也伺候者對敵人有隙則出而乘之也故騎所以能踵人之敗軍絕彼之糧道擊敵之便寇也

故車騎不敵戰則一騎不能當步卒一人三軍之衆成陳而相當則易戰之法一車當步卒八十人八十人當一車一騎當步卒八人

八人當一騎一車當十騎十騎當一車

故車騎不相敵而與人戰則一騎不能當步卒一人使三軍之衆成陣而相當則易地戰陳之法一車可當步卒八十人八十人可當一車二騎可當步卒八人八人可當一騎一車可當十騎十騎可當一車

險戰之法一車當步卒四十人四十人當二車一騎當步卒四人四人當一騎一車當六騎六騎當一車

險地戰陳之法一車可當步卒四十人四十人可當一車一騎可當步卒四人四人可當一騎一車可當六騎六騎可當一車蓋車騎利平地故當步兵多步兵利險阻故當車騎多

夫車騎者軍之武兵也十乘敗千人百乘敗萬人十騎走百人百騎走千人此其大數也夫車騎者乃軍之武兵也車十乘可敗步卒千人車百乘可敗步卒萬人騎十匹可

走步卒百人騎百匹可走步卒千人此用車騎之大數也此亦以平易地言之故車騎能敗走步卒之多也

武王曰車騎之吏數陣法奈何太公曰置車之吏數五車一長十車一吏五十車一率百車一將易戰之法五車爲列相去四十步左右十步隊間六十步險戰之法車必循道十車爲聚二十車爲屯前後相去二十步左右六步隊間三十六步五車一長縱橫相去一

里各返故道

武王問曰車騎之吏數與陣法奈何太公對曰置車之吏數五車設一長十車置一吏五十車立一率百車命一將其易地戰陳之法五車爲一列前後相去四十步之遠左右相去十步隊間用六十步險地戰陳之法車必要循行道路十車爲一聚二十車爲一屯前後相去二十步左右相去六步隊間用三十六步五車一長縱橫相

去一里之遠各返歸故道

置騎之吏數五騎一長十騎一吏百騎一率二百騎一將易戰之法五騎爲列前後相去二十步左右四步隊間五十步險戰者前後相去十步左右二步隊間二十五步三十騎爲一屯六十騎爲一革十騎一吏縱橫相去百步周還各復故處武王曰善哉

置騎之吏數五騎設一長十騎置一吏百騎立一率二百騎命一將其易地戰陳之

法五騎爲一列前後相去二十步之遠左右相去四步隊間用五十步險地戰陳之法前後相去十步左右相去二步隊間用二十五步三十騎爲一屯六十騎爲一輩十騎設一吏縱橫相去百步周還各復歸故處武王曰公言善哉

武車士第五十六

武車士者選擇材技之人用車以戰謂之武車士

武王問太公曰選車士奈何太公曰選車士之法取年四十以下長七尺五寸以上走能逐奔馬及馳而乘之前後左右上下週旋能束縛旌旗力能殼八石弩射前後左右皆便習者名曰武車之士不可不厚也

武王問太公曰選簡車士之法奈何太公對曰選簡車士之法取其年方四十已下身長七尺五寸以上走能追逐奔馬及馳而乘之或前或後或左或右上下週迴旋

轉又能束縛旌旗力能彀八石弩八石八  
百斤也射前後左右皆便利習熟者如楚  
樂伯與晉戰左射馬右射人使角不能進  
此是射前後左右便習者名曰武車之士  
不可不重厚也

### 武車士第五十七

武騎士者選擇材技之人乘騎以  
戰謂之武騎士

武王問太公曰選車士奈何太公曰選車士

之法取年四十已下長七尺五寸以上壯健  
捷疾超絕倫等能馳騎彀射前後左右周旋  
進退越溝塹登丘陵冒險阻絕大澤馳強敵  
亂大眾者名曰武騎之士不可不厚也

武王問太公曰選簡騎士之法奈何太公  
對曰選簡騎士之法取年方四十已下身  
長七尺五寸以上力氣壯健行步捷疾超  
過等輩能馳騎彀射或前或後或左或右  
周迴旋轉以進以退越溝塹之深登丘陵



之高冒險阻之艱絕大澤之水馳強勇之  
敵亂盛大之衆名曰武騎之士不可不重  
厚也

戰車第五十八

戰車者以車與敵戰務知其地形  
之便不便也

武王問太公曰戰車奈何太公曰步貴知變  
動車貴知地形騎貴知別徑竒道三軍同名  
而異用也凡車之戰死地有十勝地有八

武王問太公曰以車與敵戰奈何太公對  
曰用步貴知敵之變動用車貴知地之形  
勢用騎貴知山林之別徑竒道三軍同其  
名而異其用也凡車戰死地有十勝地有  
八

武王曰十死之地奈何太公曰往而無以還  
者車之死地也

武王問曰戰車十死之地奈何太公對曰  
前往而無以還返者乃車之死地也死地

則無進

越絕險阻乘敵遠行車之竭地也

越絕險阻之處以乘敵人之遠行者乃車之竭地也竭地則無追

前易後險者車之困地也

前面平易後面險隘者乃車之困地也困地則無出

陷之險阻而難出者車之絕地也

陷於險阻之處難得而出者乃車之絕地

也絕地則無戰

圯下漸澤黑土黏埴者車之勞地也

圯壞卑下漸洳澤鹵之處有黑土黏埴者乃車之勞地也勞地則無越

左險右易上陵仰阪者車之逆地也

左拒險阻右澤平易上越丘陵仰向山阪者乃車之逆地也逆地則無攻

殷草橫畝犯歷之澤者車之拂地也

殷盛之草橫連田畝犯歷深浚之水澤者

車之拂地也拂地則無留

車少地易與步不敵者車之敗地也

車乘寡少地勢平易與步兵不能相敵者  
乃車之敗地也敗地則無止

後有溝瀆左有深水右有峻阪者車之壞地  
也

後有溝瀆而不能退左有深水右有峻阪  
而不能馳者乃車之壞地也壞地則無前  
日夜霖雨旬日不止道路潰陷前不能進後

不能解者車之陷地也此十者車之死地也  
故拙將之所以見擒明將之所以能避也

日夜有霖雨旬日不止已道路皆潰陷吾  
欲前不能進後不能解脫者此車之陷地  
也陷地則謀出已上十者皆車之死地也  
故無謀之將所以見擒於人明智之將所  
以能避去也

武王曰八勝之地奈何太公曰敵之前後行  
陳未定即陷之旌旗擾亂人馬數動即陷之

士卒或前或後或左或右即陷之陳不堅固  
士卒前後相顧即陷之前往而疑後往而怯  
即陷之三軍卒驚皆薄而起即陷之戰於易  
地暮不能解即陷之遠行而暮舍三軍恐懼  
即陷之此八者車之勝地也

武王問曰戰車八勝之地奈何太公對曰  
敵之前後行伍陳勢未定即馳而陷之敵  
之旌旗擾亂人馬頻數驚動即馳而陷之  
敵之士卒或前或後或左或右而無定止

即馳而陷之敵人行陳不堅固士卒前後  
相顧望即馳而陷之敵人欲前往而疑惑  
後往而恐怯即馳而陷之敵人三軍倉卒  
驚擾皆迫而起即馳而陷之與敵人戰於  
平易之地日已昏暮不能解脫即馳而陷  
之遠行於路日暮方止三軍又驚恐畏懼  
即馳而陷之此八者皆車之勝地也

將明於十害八勝敵雖圍周千乘萬騎前驅  
旁馳萬戰必勝武王曰善哉

爲將者明於此十害八勝敵人雖圍周於我車千乘騎萬匹吾驅之而前馳之於兩旁萬戰必勝矣武王曰公言善哉

戰騎第五十九

戰騎者以騎與敵戰而欲取勝也

武王問太公曰戰騎奈何太公曰騎有十勝九敗

武王問太公曰以騎與敵戰奈何太公對曰用騎兵取勝之術有十敗地有九

武王曰十勝奈何太公曰敵人始至行陳未定前後不屬陷其前騎擊其左右敵人必走武王問曰騎之十勝奈何太公對曰敵人初至行列陳勢未定前後不相聯屬吾即陷其前騎或擊其左右敵人必走矣敵人行陳整齊堅固士卒欲鬪吾騎翼而勿去或騎馳而往或馳而來其疾如風其暴如雷白晝如昏數更旌旗變易衣服其軍可克敵人行列陳勢整齊堅固士卒欲與我鬪

令吾騎兵翼其左右而勿去或馳之而往  
或馳之而來其勢如風之迅疾如雷之暴  
猛使白晝如昏暗數更換吾之旌旗變易  
吾之衣服其軍必可克矣  
敵人行陳不固士卒不鬪薄其前後獵其左  
右翼而擊之敵人必懼

敵人行陳不堅固士卒不敢鬪吾乃薄其  
前後獵其左右翼兩旁而疾擊之敵人必  
懼矣

敵人暮欲歸舍三軍恐駭翼其兩旁疾擊其  
後薄其壘口無使得入敵人必敗

敵人值天暮欲歸舍次三軍恐懼驚駭吾  
乃翼其兩旁疾擊其後迫其壘口無使得  
入其屯營敵人必敗矣

敵人無險阻保固深入長驅絕其糧道敵人  
必飢

敵人若無險阻保固吾當深入長驅斷絕  
其糧道敵人必飢矣

地平而易四面見敵車騎陷之敵人必亂  
敵人所處之地平而且易四面見敵於人  
吾以車騎陷之敵人必亂矣

敵人奔走士卒散亂或翼其兩旁或掩其前  
後其將可擒

敵人士卒奔走散亂吾或翼擊其兩旁或  
掩襲其前後其將可擒矣

敵人暮返其兵甚衆其行陳必亂令我騎十  
而爲隊百而爲屯車五而爲聚十而爲群多

設旌旗雜以強弩或擊其兩旁或絕其前後  
敵將可虜此騎之十勝也

敵人日暮而返其兵士甚衆其行伍陳勢  
必亂令我騎兵十而爲一隊百而爲一屯  
車五而爲一聚十而爲一群多設置旌旗  
錯雜以強弩或翼擊其兩旁或斷絕其前  
後敵將可虜矣此已上乃騎之十勝也○  
按十勝而止有八恐脫簡耳

武王曰九敗奈何太公曰凡以騎陷敵而不

能破陳敵人佯走以車騎返擊我後此騎之  
敗地也

武王問曰騎之九敗奈何太公對曰凡以  
騎兵陷敵而不能破散其陳敵人佯敗而  
走以車騎返邀擊我後此騎兵之敗地也  
追北踰險長驅不止敵人伏我兩旁又絕我  
後此騎之圍地也

吾追敵人之奔北踰越險阻長驅不止敵  
人伏我兩旁又斷絕我後此乃騎兵之圍

地也

往而無以返入而無以出是謂陷於天井頓  
於地穴此騎之死地也

往而無以還返入而無從以出是謂陷於  
天井之內頓於地穴之中此乃騎兵之死  
地也

所從入者隘所從出者遠彼弱可以擊我強  
彼寡可以擊我衆此騎之沒地也

所從入者狹隘所從出者迂遠彼弱可以



擊我之強彼寡可以擊我之衆此乃騎兵之沒地也

大澗深谷翳茂林木此騎之竭地也

凡遇大澗深谷及林木翳茂之處此乃騎之竭地也

左右有水前有大阜後有高山三軍戰於兩水之間敵居表裏此騎之艱地也

左右有深水前面有大阜後又有高山吾三軍戰於兩水之間敵人居於表裏此乃

騎兵之艱地也

敵人絕我糧道往而無以還此騎之困地也  
敵人斷絕我糧道有往之路而無還返之

道此乃騎兵之困地也

汙下沮澤進退漸洳此騎之患地也

汙下沮澤之中進退泥濘漸洳此乃騎兵之患地也

左有深溝右有坑阜高下如平地進退誘敵此騎之陷地也此九者騎之死地也明將之

所以遠避闇將之所以陷敗也

左有深浚之溝右有坑阜之險高下只如平地進退則誘敵之來此乃騎兵之陷地也此已上九者皆騎之敗地也明智之將所以能遠避昏闇之將所以必陷敗也○愚按車騎之敗皆以地言者謂吾自陷於地形之未便而致敗非人敗之也吾能審而避之則豈能敗之哉車騎之勝皆以敵言者謂敵有可乘之形即馳而勝之也敵

若無可乘之形則豈能勝之哉故敗者自敗也非人敗之勝者非自勝也因人之形而取勝也孫子曰兵因敵而制勝其此之謂歟

### 戰步第六十

戰步者以步兵與車騎戰而欲取勝也

武王問太公曰步兵車騎戰奈何太公曰步兵與車騎戰者必依丘陵險阻長兵強弩居

前短兵弱弩居後更發更止敵之車騎雖衆  
而至堅陣疾戰材士強弩以備我後

武王問太公曰步兵與車騎戰爲之奈何  
太公對曰步兵若與車騎戰必依丘陵險  
阻之地以長兵強弩居前以短兵弱弩居  
後更迭而發更迭而止敵人車騎雖衆而  
至吾堅陣疾戰以材士強弩防備其後

武王曰吾無丘陵又無險阻敵人之至旣衆  
且武車騎翼我兩旁獵我前後吾三軍恐怖  
亂敗而走爲之奈何

武王問曰吾無丘陵險阻而依之敵人之  
至旣衆且多武勇以車騎翼擊我兩旁獵  
取我前後吾三軍驚恐畏怖皆亂敗而走  
則爲之奈何

太公曰令我士卒爲行馬木蒺藜置牛馬隊  
伍爲四武衝陣望敵車騎將來均置蒺藜掘  
地匝後廣深五尺名曰命籠人操行馬進步  
闌車以爲壘推而前後立而爲屯材士強弩

備我左右然後令我三軍皆疾戰而不解武  
王曰善哉

太公對曰令我士卒爲行馬木蒺藜置牛  
馬隊伍牛馬隊伍如尔朱兆圍齊神武於  
高陵山神武連繫牛驢爲隊而塞其闕之  
類是也又令銳士結爲四武衝陣望敵車  
騎將來均置蒺藜掘地周匝廣深各五尺  
名曰命籠令人操行馬進退闌軍以爲壘  
推而前推而後立之以爲屯材士強弩備

禦左右然後令我三軍皆與之疾戰而必  
得解免武王曰公言善哉○愚按黃帝平  
蚩尤之亂始制軍法因井田而定卒伍之  
數一以奮武威一以昭文德雖聖人亦不  
免於不用也是以虞有三苗之師夏有甘  
扈之征湯有鳴條之伐武有牧野之戰周  
公有東山之役孔子有却萊墮費之舉由  
是言之兵其可廢乎成周之世其法盡蒺  
有事則選將於卿徵兵於農事平則將歸

于朝兵散于野故在廷無跋扈之臣在郊  
無暴橫之卒是何也由能合文武兵農而  
一者也春秋之時齊桓晉文之爲君夷吾  
子犯之爲臣尚能教民以義齊民以禮撫  
民以信而後用之下迨戰國魏置武卒齊  
置技擊秦置銳士任用起翦頗牧之徒日  
尋干戈以相征伐荼毒生民糜爛萬姓爭  
地以戰者則殺人盈野爭城以戰者則殺  
人盈城於是乎文自文武自武兵自兵農

自農漢置南北二軍而居重馭輕之術粗  
備七國之叛命周亞夫將三十六將軍建  
瓴東下不三月而平之良有以也李唐因  
西魏後周舊制而立府兵初焉甚善其後  
張說壞之李林甫又壞之兵壞於內藩鎮  
盛於外終唐之世以迄五代其弊不可救  
止趙宋監前之失罷石守信等兵權而用  
郭進李漢超等爲將控扼西山鎮守關南  
小其名而崇其勢略其細而求其大以其

官而責其成隆之以恩厚之以誠富之以財故養士少而蓄力多操術簡而收功博可謂得任將之術治兵之道矣然此止可以戒殘唐五代之覆車而烏可比隆成周之盛哉澶淵之盟不能命一方叔選一衛青任一李靖總銳師以破契丹之衆而勞翠華之遠幸其後承平日久專事因循西不能滅繼遷之侵侮北不能禦女真之強暴雖曰設武舉而不知所舉者何人雖曰

脩武備而不知所備者何事馴致至於靖康狂胡憑陵於郡縣戍馬馳騫於郊畿却李綱种師道之謨謀信郭京劉孝竭之妖術欲用六甲法六丁力士北斗神兵天關大將生擒幹輿不等既而作法無效欺衆下城南走金虜四入登城守兵披靡而散嗚呼痛哉南渡之初志在恢復及李綱竄而宗澤死秦檜相而岳飛亡復仇討賊之計不聞割地講和之義蠶起典樞機者醉

生而夢死執兵柄者烏竄而鼠伏坐使氈  
裘腥羶之氣充滿關河淮濟之間孝宗淳  
熙二年試進士舉蜀人楊甲對言恢復之  
志不堅者二其一策士之始及於兵者不  
過一言是以談兵革爲諱論兵革爲迂也  
夫旣以兵革爲迂而諱之宜乎終宋之世  
而不振焉元氏乃爲失計隳名城而不守  
棄武備而不脩禁漢人南人不得執弓矢  
操刀兵而所謂七書者又孰得而聞之抑

不審天生五材民並用之誰能去兵庚申  
之季毗隸一呼中原因之而土崩瓦解矣  
我

朝混一海宇內立五府以統十二都司十二  
都司控制管軍衛所無事則屯田積穀完  
城固守有事則選將練兵禦敵制勝此即  
寓兵於農之法洪武丁丑歲

太祖高皇帝俾軍官子孫演習弓馬講讀武  
書慣熟通曉者臨期試用誠持盈守成之

首務安不忘戰之要道也學者其可不體  
之而盡其心乎欲盡心而爲學當以仁義  
忠恕爲本無扭於詐謀詭計以力相尚曷  
不觀夫杜郵之白起陰陵之項藉再世爲  
將之趙括三世爲將之王離乎以仁義忠  
恕爲本必若鄧禹曹彬而後可吁盛矣

武經七書六韜直解卷第六終

天保堂印



